



**PM Modi-i Excise policy ken o ya tai ta nangzüker**



VOL. XXI ISSUE NO. 222 (ADOK 222) DIMAPUR

KÜPTOKNU (SATURDAY)

MONUPII (MAY) 25, 2024

₹ 5.00

## Kejriwal-i 'BJP succession war' indang jembir

New Delhi, May 24, 2024 (Agencies): BJP sasep nung "succession war" ka lir aser Prime Minister Narendra Modi-i Union Home Minister Amit Shah nem pa melenzüksü atema lenmang lapoktsür ta Delhi Chief Minister Arvind Kejriwal-isa ashi.

"Nenoki internet nung reprangdanggang, Amit Shah-i 2019 küm arishi küm 75 tema lenmirtem ajak anisüngzüktsü ta shia liasü. 2014 nung Narendra Modi-i Prime Minister inyaktsü agizükba sülen lanurtemi maongka angutsüla ta shia mapa tenzük" ta Arvind Kejriwal-isa ashi.

Arishi küm 75 temapur shinga BJP aser sorkar nung mapa magütsütsü ta PM Modi-i ashi. Iba tangatetba nung LK Advani anisüngzüktsü, Murli Manohar Joshi anisüngzüktsü, Sumitra Mahajan sodi agidaktsür

anisüngzüktsü, anungji parnokia iba inyakyim sülen anidaktsü, ta Kejriwal-isa ashi.

"Parnok (BJP) sasep nung rara ka odar. PM Modi-i lenmirtem ka khen ka ta sendok. Shivraj Singh Chouhan agien, Vasundhara Raje agien, Khattar agien, Dr Raman Singh agien. Yogi anünga lir saka pa agentsü ta olulu kar jembidar" ta paisa ashi.

September 17, 2025 nü Prime Minister Narendra Modi arishi küm 75 ajungdang pai pa melenzüksü assoshi Amit Shah shimtsü ta Tihar Jail nungi interim bail nung chiokba sülen Arvind Kejriwal-iba onük shijen shia arur.

Külen, BJP-i Arvind Kejriwal indang onük magizüker. Narendra Modi-i maneni Prime Minister inyaktsü aser pa kümsük tasembuba tembangta inyaktsü ta Union Home Minister Amit Shah-i ashir.

## Opposition ya tsükchir ama mezüngshir: PM Modi



Prime Minister Narendra Modi-i NDTV osangbener den sensaksemang agiba noksa ka angur.

New Delhi, May 24, 2024

(Agencies): Prime Minister Narendra Modi-i Opposition ya pa tsükchir ama meblemer saka Opposition lenmirtem den külemi inyaknür ta metedaktsügo.

"Ni kodanga parnok anema menotkater aser parnok den külemi inyaknür. Ni shinga ilaa meblemer. Parnoki küm 60-70 tashi sorkar kettangsüa aruogo aser ni parnoki mapa tajung inyakbatem angazüknür. Ni Opposition ya tsükchir ama meblemer" ta PM Modi-i ashi.

"Opposition nung kü nem shisatsü agütsüspur aika ajangshia arur lenmirtem lira ni pelashishia agizüksü. Parnoki media dang tajung mesüra

tamajung ashitsü akok, saka parnoki linük ajungtsü atema kündlangkar shinüra ni pelashishia agizüksü. Ni shinga anema tamajung meblemer" ta pai ashi.

"Ni akhi tangatetba agiennür. Putu 18 buba nung yangluba sobaliba aser ozüngtem ajanga Putu 21 buba nung India tarutsü meyanglunür. Ni temelensi bener arunür, inyaknür aser melenshidaktsünür" ta Modi-isa ashi.

June 4 anogoji BJP-i aniba sorkar expiry date ta West Bengal Chief Minister Mamata Banerjee-i jembiba atema PM Modi-i "Lai shitak jembir. June 4 nü sorkar kümsük tembangtsü aser sorkar

tasen ka akümtsü. Temzung nung lateta aliba ama sorkar kümsük tembangtsü. Elections sülen sorkar tasen ka akümtsü aser onoki iba sorkar tasenji akümtsü" ta ashi.

Narendra Modi-i Prime Minister Jawaharlal Nehru-i kümsük aseben tashi Prime Minister inyakba den kasa inyaktsü akok ta nisungtemi jembir.

"Gujarat nung analysts-i state nung mapang talangtiba chief minister inyakertem indangsa zülu. Iba mapaji analysts indang lir. Nenoki kümsük aika inyakba indang masü saka Modi'er kümsük mapang India kobika tejakleni ao ta asüba asadangtsüla" ta Narendra Modi-i ashi.

"Modi-i aseben, punguben mesüra tenetben takok angutsü. Iba ya inyaktettsü atema India nung nisung crore 140 indang temoatsü künd den lir" ta pai ashi.

Jawaharlal Nehru-i 1947 nungi 1964 tashi Prime Minister inyaka liasü. 1951-52 nung Congress party-i mezüngbuba general elections takok anguba sülen pa Prime Minister inyaktsü shim. Iba sülen 1957 aser 1962 elections nunga Congress-i takok ngua Nehru-i Prime Minister inyak.

## Taoba MLA Tarie Zeliang-i NDPP toktsür Congress nung aden

Dimapur, May 24, 2024 (TYO): Nagaland Governor La Ganesan-i Brihostibarnü Uttar Pradesh Governor den ajurutep ta Raj Bhavan Nagaland-i metedaktsü.

Deobarnü pa Nagaland-i meyipa arutsü ta Raj Bhavan osang ajangasa ashi.

Supreme Court-i obendang agütsüba sülen Ayodhya nung Ram Temple yangluogo.

Constituency nungi MLA inyaka liasü.

Tarie Zeliang-i Brihostibarnü NPCC President aser Lok Sabha candidate S Supongmeren Jamir tsüngdang Congress nung züngsem aküm ta Nagaland Pradesh Congress Committee

(NPCC)-i metedaktsü.

India tanüla kümzüka ayutsü atema Congress-i inyakba tashi itdaktsütsü atema Tarie-i iba lemtet agiba atema pelar aser pa pelashishia agizüker ta NPCC Communications Department sangdong ka nung ashi.

## Ang Mai-i India o Myanmar den yimjung olempet tenzüknür

Kohima, May 24, 2024 (Agencies): Ang Mai-i aniba National Socialist Council of Nagaland-Khaplang (NSCN-K) aunga India aser Myanmar den olempet alitsü metedaktsügo.

Tashimaitba masü saka yimjung, azükaru aser terenlok aginüba agi iba lemtet agi ta Ang Mai-i aniba NSCN-K aunga metedaktsü.

"Naga nunger alidak yimjung, azükaru aser terenlok alitsü atema India aser Myanmar den yimjung yanglutsü ta chairman Ang Mai, vice-chairman Nyeton Konyak aser general secretary Kughalu Mualtonu nungeri sign asüba shidi ka nung shia lir.

India den yimtenren olempetpi Indian Constitution dak alia pei sasa kettangsüba tashi mesüra maparen nung ajemdaker asütsü

ta NSCN-K-isa ashi.

"Tang atema inyaka atasü atema lemtet agira ibaji Framework aser Agreed Position madak asütsü" ta parnokisa ashi.

Ang Mai-i aniba NSCN-K-isa NGOs, civil society groups, political parties mesüra government bodies den tesentaktep mayubaji Naga nunger pei sasa kettangsüba tanüker ka ama inyakba atema lir ta parnokisa ashi.

"Naga nungeri Tsüngrem aser mojing naprong metenzüktetsü mesüra nationalism aser factionalism külemi metenzüktetsü. Putu aser asotem melenshia arudang, lenmirtem melendang Naga nungeri tanga kecha masü saka Naga nationalism dang tenzüksüla" ta NSCN-K-i metedaktsügo.

November 11, 1975 nü Shillong Accord agiba ya Naga National Council (NNC)-i India ket nung bendanga agütsüba ama züngshir ta parnokisa ashi.

Onoki Khaplang Plan of 1997 tenangzükba nung noktaka lir, iba ya Naga nunger tsüngda yimjung aser telongjem atema lir. Iba Plan ya "Nagaland for Christ" nung "Forgive and Forget" tangatetba kübok lir, ta NSCN-K-isa ashi.

NSCN-K aser Council of Naga Churches (CNC) aunga Naga nuger aliba tesem ajak nung "Nagaland for Christ" mangdang ajungkettsü atema inyaktsü metedaktsügo.

"Naga nungeri kidangertem atema teti kishi lapokja lir aser tanü-a NSCN-i iba teinyaktsü nungi mepilatsü" ta Ang Mai-i aniba NSCN-K aunga ashi.

## CAA ajanga NE nung tetsükdaktsü bentsür arutsü

Guwahati, May 24, 2024 (Agencies): Communist Party of India-Marxist (CPI-M)-i Citizenship Amendment Act (CAA) atema tebilemtsü aika lemsatepogo.

Iba Act ajanga Northeast litsü, rongsenketzung, sobaliba, mapa, loktiliba, ali aser tanga rongsentem dak kanga mejungi kongshitsü ta CPI-M-i ashi.

"CAA-i tribal autonomous district council (ADC) tesemtem nung mekongshitsü ta nangzükba aitsür. State ka nung CAA benokba ajanga ADC areas aser non-ADC areas nung timtem aika bentsür arutsü" ta Tripura CPI-M state secretary Jitendra Chaudhury-i ashi.

CPI-M-i tetenzük nungi CAA anema noktaker aser maneni Centre sorkar dang iba ozüng Northeast nung mebenoktsü ayongzükba ta Tripura nung opposition party leader Chaudhury-i ashi.

Northeast nung autonomous district council (ADC) 10 lir aser itemji Assam, Mizoram o Meghalaya nung asemsem aser Tripura nung ka lir.

Centre sorkari kanga dang aritepa taküm March ita CAA ozüngtem latetogo. Iba ya Lok Sabha elections nung tajangzük angutsü atema yangluba lir ta taoba minister aser CPI-M central committee member Chaudhury-i ashi.

2019 nung Assam, West Bengal kübok tesem kar aser tanga Northeast state tem nung CAA anema lungkak aita liasü. 2020 nung COVID-19 wara adokba ajanga iba sentong anentsüsa aküm.

CAA anema lungkak aitdang Assam nung nisung 5 aser Tripura nung nisung 1 taküm samaoga.

March 11 nü Centre sorkari Citizenship Amendment Rules 2024 sangdongogo aser iba ajanga CAA mapa tenzüksü lenmang lapoktsü.

CAA ajanga Bangladesh, Pakistan aser Afghanistan nungi December 31, 2014 matongdang reshikangshi tia ajurur Hindu, Sikh, Jain, Buddhist, Parsi aser Christian tem India nung araujenoker nem senso agütsütsü.

ta NSCN-K-isa ashi.

"Tang atema inyaka atasü atema lemtet agira ibaji Framework aser Agreed Position madak asütsü" ta parnokisa ashi.

Ang Mai-i aniba NSCN-K-isa NGOs, civil society groups, political parties mesüra government bodies den tesentaktep mayubaji Naga nunger pei sasa kettangsüba tanüker ka ama inyakba atema lir ta parnokisa ashi.

"Naga nungeri Tsüngrem aser mojing naprong metenzüktetsü mesüra nationalism aser factionalism külemi metenzüktetsü. Putu aser asotem melenshia arudang, lenmirtem melendang Naga nungeri tanga kecha masü saka Naga nationalism dang tenzüksüla" ta NSCN-K-i metedaktsügo.

"Naga nungeri kidangertem atema teti kishi lapokja lir aser tanü-a NSCN-i iba teinyaktsü nungi mepilatsü" ta Ang Mai-i aniba NSCN-K aunga ashi.

## IPR Department nung ketdangsür aser staff tem training agi



DIPR indang Conference Hall, Kohima nung May 24, 2024 nü Skill Upgradation Training alidang shisalen sayur Media Secretary CMO, Ayieno Kechu aser Dy. News Director, Photography & Storytelling, The Associated Press (News Agency) Yirmiyan Arthur nungeri o jembidang tangokba noksa nung angur.

### Dimapur, Monupii/May 24

(TYO): Nagaland indang Information & Public Relations (IPR) ketdangsür aser staff tem tali tashi itsitsü mechii Directorate of Information & Public Relations, Kohima nung ananü skill upgradation training sentong agiba May 24, 2024 nü tembanga liasü.

Iba training nung takotet nisung temi onük balala nung ajemdaker o jembia liasü. Media Secretary, Chief Minister's Office, Ayieno Kechu-i mapa nung yimya shidak amshitsü, zükla maotsü, aser pei mapa nung bendanga agütsür inyaktsü

tongtipang lir ta ashi.

Nüburtem nem osang sangdongtsü atema ketdangsürtem tongtipang shilem lir, anungji tajungtiba nung inyaktsü, ta lai ashi.

Associated Press nung Asia Pacific indang Deputy News Director Yirmiyan Arthur-i ashiba agi, IPR ketdangsürtem aser staff tem ya Nagaland nung aliba nüburtem nem osang mezüngbuba agütsürtem lir. Lai training agirtem dang iba maongka agia temulung agüja training nung adentsü aser osangtsüsang kanga junga agütsürtem lir.

ayongzüka liasü.

Iba training nung Joint Director, IPR, Asangla Imsong-i anir session ka agiba nung lendong timtem mapang nüburtem nem osang tejangja agütsütsüba indang sayua liasü.

Osang tejangja bendena nüburtem nem digital channel tem ajanga agütsütsü aser kensü-osü aketba osang tem kumdanga amshitsü indang lai ashi.

Joint Director, IPR, Simon Teilia-ia department telungzük nung ketdangsürtem tsüngta tesendaktep tajung alitsü indang jembia liasü.

## NHM Nagaland kübok maparen balala asadanga senden amen



National Health Mission (NHM), Nagaland kübok Programs aser Activities balala asadangba senden ka May 23, 2024 nü Conference Hall DH&FW, Kohima nung amendang Minister, H&FW, P. Paiwang Konyak-i lokti ayongzüka jembidang tangokba noksa angur.

### Dimapur, Monupii/May 24

(TYO): National Health Mission (NHM), Nagaland kübok inyakyim balala asadangba senden ka May 23, 2024 nü Directorate of Health & Family Welfare indang Conference Hall, Kohima nung mena liasü, kong Minister, Health & Family Welfare, P. Paiwang Konyak aser Commissioner & Secretary, Health & Family Welfare, V. Kezo nungera dena liasü.

Iba senden nung Minister P. Paiwang Konyak-i jembidang, iba ama senden nung NHM kübok tebilemtsü balala ajuruba lemsateptsü maongka angur aser asenok lungjemer lenmang bushir, ta ashi.

National Health Mission kübok sentong balala inyakba nung senotsü tsütsü timtem ajurur aser sentong balala nung sen lemzüksüba ya nüngdak yari asütsila, ta pai ashi.

Tarutsü anogotem nung

Programme Officers balala nungi mapang shidak nung inyaksanghiba osang lemsateptsü aser ajak lungjemer state nung health programme balala külemi inyaktsü Minister Paiwang-i ayongzüka liasü.

Asenok kati ka dang mapa nung temulung agütsütsü ajungshitsü nüngdaker aser metokmeperi aser tongtipang teinyaktsü balala ajangshidang Minister aser Commissioner & Secretary nem metetdakstsütsü tongtipang, kechiaser yamaji inyakba ajanga onokia shilem agitsü aser department ajangzüksü, ta Commissioner & Secretary, Health & Family Welfare, V. Kezo-i ashi.

Kibong ka ama Department lungjemer ken o balala jembia nükjidong tejangja yur meranga inyaktsü nüngdaker aser jokorla health care management ya Indian Public Health Standard Norms (IPHS) den lirumedema aotsüla, ta pai ashi.

Tang tashinung Programme balala nung takok anguba atema Principal Director, Directorate of Health & Family Welfare, Dr. E. Motsuthung Patton-i tenungsang agüja liasü.

Paisa Program Officers ajunga dang asenoki asen nükjidong matong tashi aser asen indicators tajungba kuma merenlok tashi State nem Government of India-i senotsü shidak magütsütsü aser programme balala inyakba nung tetsüdkakstsü ajurutsü, ta pai ashi.

Mission Director, National Health Mission, Nagaland, Dr. Akuo Sorhie-i Mission indang inyakyim tongmelang agi rateta ashi aser iba senden nung State Program Officer, NHM, Dr. Mereninla Senlem menden liasü.

Iba senden nung National Health Programs ajunga nungi presentation agüja sensaksema liasü.

## Nagaland nung oil palm mezüngbuba agizük tenzükogo

### Dimapur, Monupii/May 24

jembiteba aru aser ibaji ajanga Expression of Interest for Zone 1 ajanga Godrej Agrovet Private Ltd (GAVL) den January 9, 2023 nung department-i MoU ya zülutep, ta Yanthan-i ashi.

Iba MoU indang clause 4 nung aliba ama company (Second Party) yagi iba MoU nung aliba mapa inyak tenzüker anogo 60 tsüngta Zone-I nung Oil Palm nursery(s) amenoka Oil Palm sapling alemtsü, ta ashi.

Iba clause nung aliba ama inyaka Jalukie aser Niuland nung nursery ka-ka amenoka lir.

Department ajangasa MoU züluteptsü atema company nem

'pre requisite' ka agütsüba nung süngtong tejentem parnokisa alizüksü indang shia liasü aser parnoki mulunga MoU nung Second Party yagi tesem ulushiba den külemi tema aliba oil palm süngtong ajak adopt asütsü zülutep, ta ashi.

GAVL ajanga iba maparen tekeratiba nung inyakba atema Yanthan-i tenüngsang agüja liasü.

Iba sülen department ketdangsür aser staff tem 'buy back process' atema sensaksema liasü.

Wokha nung oil palm metric tonne 5 shi bendena Kolasib, Mizoram nung aliba GAVL Oil palm processing mill dangi yoktsü atema alizüksü.

## EE, Electrical Division Mon ajanga metetdakstsütsü

### Dimapur, Monupii/May 24

mesenloka ayutsü atema poles amshiba angazüker, ta ashi.

Technical shisatsü aser yimya mamshi electricity dak sendakba osettüset amshiba nung lendong timtem lir, ta pai ashi.

Pai tekeraba nung department den osang agiteper poles nungi telecom cables tem agentsü metetdakstsüogo, aser poles raksaba ajanga lendong ajurura telecom company khuret asütsü, ta sangdong ajanga ashi.

## Dimapur nung CSF vaccination ayongzüker

### Dimapur, Monupii/May 24

sentong takok ngua agitetsü asoshi Dimapur district kübok yimtsüng balala nung yimten yimsüsür, ketdangsür temi Department den teka amteper inyaktsü ayongzüker, ta sangdong ajanga ashi.

Iba dak sendakba nung Dr. Bocto Sumi, Dy. Director den mobile number 7005197647 ajanga tongteprateptsü akok ta ashi.

## Pungro nung awareness campaign ayongzük

### Dimapur, Monupii/May 24

moko ajanga nisung asüba indang osangtsüsang lemsatepa liasü.

Iba sentong nung kaketshir nem Information, Education and Communication (IEC) oset lema agüja liasü.

Iba sentong ya Medical Officer, CHC Pungro, Dr. Weri Mero-i anir telok kati ayongzüka liasü.



May 24, 2024 nü Gurdaspur nung Ato kilonser, Narendra Modi-i Lok Sabha election sentong ka nung jembitsü lia aluyimertem longkak aita iba tesem jagi aodang police-i nokdangba sülen tangokba noksa nung angur.

## Tanü state/UTs 8 nung Lok Sabha menden 58 atema election agitsü

New Delhi, May 24

(Agencies): Honibarnü Delhi densema state aser Union territories 8 nung Lok Sabha election shilem 6buba kübok menden 58 atema election agitsü.

May 25 nü Delhi nunga constituency tenetprongla nung election agitsü.

Tatemsu June 1 nü constituency 57 nung election agiba sülen June 4 nü vote azüngtsü.

2019 küm Lok Sabha elections nung item menden 58 nung Congress leniba nung tang opposition teloktep NDIA aser taoba mapang Congress-i aniba United Progressive Alliance (UPA)-i menden 7 nung dang takok ngua liasü aser BJP-i aniba NDA-i menden 42 ngua liasü. Iba dak alia item teloktep ana nung madenba BJD-i Odisha nung menden pezü aser Bahujan Samaj Party (BSP)-i Uttar Pradesh nung menden pezü nung takok ngua liasü.

Lok Sabha election shilem 5buba nung menden 49 atema election agidang West Bengal aser Bihar tesem kar nungbo rara adoka liasü.

Honibarnü election nung Lok Sabha menden 58 atema candidate 889-i tokteptsü.

Association of Democratic Reforms (ADR)-i ashiba agi, election shilem trokbuba nung tokteper candidates shilem 39 bo crorepati lir.

May 7 nü Jammu & Kashmir kübok Anantnag-Rajouri Lok Sabha constituency nunga election agitsü liasü saka

Election Commission-i anogo atsülangja shilem trokbuba nung ang agitsü.

Lok Sabha election shilem trokbuba nung Bihar nung Lok Sabha menden 8, Haryana nung 10, Jharkhand nung 4, Odisha nung 6, Uttar Pradesh nung 14, West Bengal nung 8, Delhi nung 7 aser Jammu & Kashmir nung menden ka atema election agitsü.

Election shilem trokbuba nung BJP candidate Bansuri Swaraj-i AAP candidate, Somnath Bharti den tokteptsü. Bansuri ya taoba mapang Union Minister asür Sushma Swaraj'er jala lir. Lai New Delhi Lok Sabha menden nung AAP lenir Somnath Bharti den tokteptsü.

Taoba election nung iba menden nung MP, Meenakshi Lekhi-i takok ngua liasü ajisiuka taküm election nungbo BJP-i

Meenakshi Lekhi nem party ticket magütsü. Swaraj aser Bharti naprongla ya lawyers lir.

Ano tongtibang candidate tem rongnung-BJP lenir Manoj Tiwari-i Congress candidate, Kanhaiya Kumar den North Delhi Lok Sabha menden nung tokteptsü. Tiwari ya iba menden nung tang MP lir. 2021 küm Kanhaiya Kumar-i Congress nung aden. Taoba Lok Sabha election nung pai CPI party nungi Bihar kübok Bigusaria menden nungi toktepa liasü saka Union Minister aser BJP lenir, Giriraj Singh matsüngdang tamakok angu.

BJP lenir aser taoba mapang Union Minister Maneka Gandhi-i Uttar Pradesh kübok

Sultanpur menden nung tokteptsü. 2019 küm election nung lai vote tali 14,000 agi takok ngua liasü.

Uttar Pradesh kübok Azamgarh menden nung Samajwadi Party Tir, Akhilesh Yadav'er kinünger Dharmendra Yadav-i Bhojpuri kentener Dinesh Lal Yadav (Nirahua) den tokteptsü. 2022 küm by-election nung Nirahua-i iba menden nung takok ngua liasü.

Jammu & Kashmir kübok Anantnag-Rajouri constituency nung People's Democratic Party (PDP) Tir Mehbooba Mufti-i Apni Party lenir Zaffar Iqbal Manhas, National Conference (NC) lenir Mian Altaf aser Democratic Progressive Azad Party (DPAP) nungi Mohammad Saleem Paray nunger den tokteptsü.

West Bengal kübok Tamluk menden nung taoba mapang Calcutta High Court judge aser Chief Minister Mamata Banerjee sashia aitsür, Abhijit Gangopadhyay-i BJP ticket nungi tokteptsü. Iba menden nung TMC party otongdar Debangshu Bhattacharya-i tokteptsü.

Haryana kübok Karnal menden nung taoba mapang Haryana Chief Minister Manohar Lal Khattar-i Haryana Youth Congress Tir, Divyanshu Budhiraja den tokteptsü.

Gurgaon menden nung BJP lenir aser Union Minister Rao Inderjit Singh-i Congress candidate aser actor, Raj Babbar den tokteptsü.



May 23, 2024 nü Thane nung chemical factory ka nung boiler ka apokba tesem nung Hokolbarnü NDRF sepaitem mapa inyakba noksa nung angur. Iba lendong nung nisung 9 asü aser 64 yirua liasü.

## PM Modi-i Excise policy ken o ya tai ta nangzüker: Arvind Kejriwal

New Delhi, May 24

(Agencies): Ato kilonser Narendra Modi-i excise policy ken o ya tai ta nangzükogo, anungji iba ken o nung pua alir ajak chioktüla, ta Hokolbarnü AAP tongti lenir aser Delhi Chief Minister, Arvind Kejriwal-i ashi.

Video conferencing ajanga osangbenertem den jembidang Kejriwal-i, BJP-i Delhi excise policy nung ochimashi lir ta ayimdena aruogo, ta ashi.

"Küm ana tashi parnoki Delhi excise policy nung sen crore 100 dak sendakba nung ochimashi liasü ta jembia aruogo saka parnoki sen ka danga



North 24 Parganas district, May 24, 2024: Bangladeshi MP, Anwarul Azim Anar tepsetba ken o dak sendakba nung Hokolbarnü West Bengal kübok North 24 Parganas district nung tai tonglokja apuba nisung ka court matsüngdangi anir aodang tangokba noksa nung angur.

## Bangladesh MP Anar tepsetba ken o nung tetsür ka dak melung malemer

New Delhi, May 24

(Agencies): Tawa Bangladesh MP, Anwarul Azim Anar tepsetba ken o dak sendakba nung Brihostibar aonung West Bengal CID-i nisung ka puogo.

Tetsür kati MP, Anar mesüza anir aru asütsüa akok, iba sülen sen agüja nisung kar nem tepsetdaktsü asütsüa akok, ta West Bengal police-i bilemer.

Police-i ashiba agi, CID apuba nisungbaji Bangladesh den International arrtsülen West Bengal area nung alir.

"Bangladesh nunger MP ji akhidang pai meteta aliba medemer tetsür kati mesüza anir aru asütsüa akok, ta bushisüngdang ajanga bushitetogo. Tetsürla jagi Anar ji New Town nung aliba ki kati jaok ta bilemer. Pa kiji tonga aruba sülen mapang tatsüka tsüngda tepset asütsüa akok, ta onoki bilemer," ta police ketdangser kati metedaktsü.

"Nisungba jagi kechiba pa (Anar) ajuru aser tena kechisa jembiar, ibaji metettsü atema maneni bushisüngdangdar," ta police ketdangser kati metedaktsü.

Anar tepsetba ken o dak sendakba nung Brihostibar aonung West Bengal CID-i West Bengal nung North 24 Parganas district kübok Bongaon area nung nisung ka apu. Iba nisungbaji Bangladesh senso aser shi-leper ka.

Asüngdangyaba mapang nung pai pa den nisung ka nati

mangu," ta Kejriwal-i ashi.

"Yashi interview ka nung Ato kilonser dang, Kejriwal-i iba ken o nung kuli ka danga menguteter ta jembir ta metedakja liasü. Ato kilonser, Kejriwal ya kanga tesangra auer ka, ibayongji sen menguteter ta ashi. Sen mengutet ta pai (Modi) nangzükogo," ta Kejriwal-i ashi.

"Ibaji miimbangtsü atema pai, Kejriwal ya kanga tesangra auer ta ashi. Tai nung apuba ya medentsütsü atema iba ya tiyazü kuli ka dang lir. Excise policy ya tai ta nai agizükra yimlibilema pua alir ajak chiokang," ta Aam Aadmi Party (AAP) tongti lenirisa ashi.



Anar temang alangsar tesem balala nung indokba nangzükogo, ta police-i metedaktsü.

Bodhbarnü West Bengal Police-i Awami League MP, Anar tepsetba osang metedakja liasü. Pa May 13 nü Kolkata nung sama.

"Tai tonglokja pua alisangi shi-leper ka lir. Pai ozüng alema India telungi ait aser pa indang maitsü miimshia Mumbai nung telidak liasü. Anar tepsettsü atema ita ishika tejaklen pa Kolkata-i jaoka liasü. Pai, ki telung nung pa den nisung pezü tasümgang nungjagi teküp agizükba sülen temang lepsaba nung parnok den yaritepba nangzükogo," ta police-i metedaktsü.

Hokolbar nikongdang tai tonglokja pua alisangi Barasat nung aliba court kati anir aoba sülen anogo 12 atema CID ket nung agütsü.

CID team kati Bhangar kübok Krishnamati yimdak tesem balala nung temang shilem balala bushi. CID-i tzu telungi air mongintem anir Bhangar nung aliba tzübo balala nungi temang shilem balala agitet.

MP Anar'er medemer aser US senso kati Anar tepsettsü atema teburtem nemji sen crore 5 shi agütsü, ta bushitetogo. Anar'er medemer tetsürla kolkata kübok New town area nung ki ka lir saka tang labo United States nung lir.



# TIR YIMYIM

## YIMOBILEM (EDITORIAL)

DIMAPUR

KÜPTOKNÜ

MONUPII 25, 2024

### Takümbo tsük lu yimdi!

**A**senok dak tajung kaji, asen kin ayak aser sobaliba mesamai wazüka ayutsü atema akhi tsüraburemi amungba benjong Moatsü aser Tsüngremmungbo amunger saka ano majung kaji, akhi tsüraburemi benjong amungtsusa inyakba mapatembo meinyaker. Iba lagi tanü asenoki asen sobaliba benjong amungba den asenok mapa aser libaliro mapeter, kechiyong mapa inyakba agi benjong amunger, anungji mapa meinyakra benjong amungtsü menüngdaker. Aji oda, alu nung tsük proka atenba sülen modong asoa toktsür moatsü amonger. Ano, iba sülen modong nung tsük adoka mena alidang Tsüngremmung amonger. Tetezü benjong amungba ya azunga aliba mapang ka apir amunger masü saka alu mapa ka temli Tsüngrem dang temotsü meshia sarasadema benjong ka mongli, ano alu mapa ka temli Tsüngrem nem tenüngsang agüja benjong ka mongli ta alu mapa o benjong na ya külem-küleme benshiba sobaliba tajung ka lir. Atangji, tanü asenok aikati mapa kanga meranga inyaker saka tekong nung alu chia tsük lu ayimba mapa tobo asenok aikati toktsüogo. Iba lagi tanü asenoki asen sobaliba benjombentsü mamonger aser amongyonga retreta mamonger. Aji oda, tanü asenoki amongba Moatsü aser Tsüngremmung yabo taoba putu nung asen tsüraburtemi monga aruba moatsü aser tsüngremmung indang otsü tejen jembia amongba mungang mesüka kümogo. Iba amaji mesüi shitakba Moatsü aser Tsüngrem tetezü keta amongtsü asoshi asenoki akhi tsürabur mapang alu ayimba mesüka tsük lu ayimtsüla. Idangji dang shitakba benjombentsü asenok mapa den putepa amungtsü. Atangji, tsük lu ayimba nung ya benjong amungbaji dang masü saka sobaliba mapa aser oshioben aika sendaka lir. Aji oda, tsük lu ayimba nung mapang mapang shia aluongertem lenpitüla sentong ayongzüka alu lenmang apitsü, aluyimba maparen nung züngr tenteta yangyutepsü, manemshillurtem yaria parnok lui nije aser ayongtepa oa inyaktsü. Tanübo asenoki tsük lu mayimba ajanga item sobaliba tajungtemji maka anenadokogo. Ibaji dang masü saka asenoki tsük lu mayimba agi asen tetsü oshi metetmeteta samaa odagi. Joko, tanü asüng chirtemibo tsük mengudang, anungji tsük memetet. Joko, asenok yimtsüngtem nunga an-i dena tsük machir, kechiyong parnokia aji mengudang, anungji chiyongtsüa ta memetet. Kasaji, tanü asüng chirtemi aluyimba yimya memetetba dang masü saka alu dak sendakba oshi mongsong, jen, jenmung, chirong, luti, pen, maipu, mertsüng, alulem, ninok, chi, aser pakti amala ojangtem memetet kümogo, kechiyong itemji mamshir aser jembidang enoksema jembitsüa nüngdak madoker. Aji oda, oshiobenji dang masü saka mapa inyakdang ola adoka meyoba aser mapa koker ola agütsüba yimyim olatem to mali kümogo. Asen kin tashi itta shia arutsü atema item sobaliba benjong, oshi-oben aser mapa inyakdang adokba ola aser yimyimtem ajak shia arudaktsütsüla. Atangji, asenoki asen sobaliba aser oshioben shia arudaktsütsü atema benjong ayongzüka amunger aser shisatokden sentonga ayongzüka ajungshiteper. Ajisüaka, mapa medenra longsulongben aser ajungshitepba kija lagi asen kin sobaliba shia marutsü aser oshioben wazüka meyutettsü. O ya mapa inyakdang kati ka den angatetepa jembitsü atema Tsüngremi agütsüba tongtepratep oset ka lir, anungji mapa meinyakra o aika jembitsü menüngdaker. Ibaji meteta asen sobaliba benjonga asen alu mapa den peta amongtsü aser asen oshia shia arudakja renlokdaiksütsü atema asenokbo takümbo yimtak aser bendanglen alirtem ajaki pei yari tsük lu tilalabo ayimtsülaa ta bilemer. Atangji, tekong nung nisung aikati tsük lu tulukabo meyimtetsü, anungji tsük aika arotsü bilema masü saka asen sobaliba aser oshioben angazükshidak kaketreju ka lapoker amai bilema asenok ajaki tsük lu tilalabosa ayimtsü ajungshir.

# OLEMSABANG

## Arogo ya kechi komaka ?

Bendang Imsong, Mokokchung.

Lai nung arogoji kar dang meshimetsüa yanglutsü or aotsü shia mali. Arogo ya tamang agi taküm aliba lokti ka lir. Aseni anguba temoatsüem nungi 10% jibo Tsüngremi pa kidangi (Arogo dangi) bener arung ta Malaki 3:10 nung shia lir.

Arogoji Tsüngrem mapa inyakdak tiyungtsü lir, anungji tamanger telongjem nung mapa inyaktsüji shibai kechi koma agütsütsü mulungtet yamaji agüjang ta 2 Korinti 9:6-8 nung shia angur. Khantepa compulsory saru mesüra takar dang meshimetsüa masü.

Tsüngrem mapa or sempet atema lokti ajangzüktsü tangar kar nungi meshia amshitsü Laishibai toyua ali asü nungbo Peteri Simon dang senji meshir lila. T.Mapa 8:19-20.

Takar kari pei mulung nung ajungshiba ajanga Arogo nem temulunger tenla aikata agütsü yonga yangjibo tai mali. Anungji arogojibo meranga tenlatsü tesayuba tama masü, saka nüburtem aser Tsüngremi temulung asütsüsa, tamang agi tamasa tanelanir aruba mapa inyakba lokti akümtsüla. Koba Arogo nung tanelan bushiba mapa nung tashi ita lidir, iba arogojibo tanelanir aser alima rongsen anaprongla nung takar akümtsü ta angateta Khristar arogoji acha-ayangtsüla.

### Mumps tashidak atema temetetsüem

Mumps ya kanga kara menatepa aoba shirang ka lir koba ajanga tanur aser tain ajak dak atonger. Mumps agi shirangba ya yakta yongi metettsü tongtibang kechiyong iba shirang menatep temela asü nung nongdangtsü mera agitsü nüngdak.

#### Menatepba (Transmission):

Mumps ya shiranga alisang tangola saloktsüba mesüra shiranga alisang den tejak jetepa jembidang tebang nungi metzüjang tila adokba ajanga nisung ka dak nungi kati menateper. Talisa kodang nisung ka joko mapang talangka shiranga alir, iba nisungba dak nungi melamela shirangji prokshir.

#### Shirangba yimya (Clinical Manifestation):

Mumps adokba tamaitsü tejangjatibaji tejak tip külen mesüra anatsülen awakba ya lir. Iba ya salivary glands awakba ajanga adoker aser iba dang 'Parotitis' ta ajar. Iba ama tejak tiptsütsü awakdang karbo kanga meyanga ashir, saka karbo kecha tango temeyang melii awaker. Mumps shirang agi meneper anogo 2 tashi nung tamasa tenarong mesüra teküm anasa meyanga tenzüker. Mumps agi atongba ajanga ano karbo temang nung tashi lula, tetsü meyanga, tokolak ngoa aser temang tera majung ama anogo 3 mesüra 4 tashi ka alir. Saka tanurtembo yamaji timtema aiben malir.

#### Meyimlaba timtem (Complications include):

Orchitis, Oophoritis, Meningitis, Encephalitis, Pancreatitis tashitak ama aser kecha mangashir akümba timtema ajurutsü akok. Mumps adokba ajanga tasüba tashi ajurubabo mali.

#### Nokdangtsüyim (Prevention):

- Mumps shirang agi tonger lira anogo 5 tashibo tangar den külemi kazütsü temerang. Mapa mesüra school-i moi kidang mungang, kokra taktang palaka nung kija kazütsü merangang.
- Teka teti merükmejua alitsü yimya sübang. Mapang shia teka shidokba ajanga iba tashidak nungi kümzüka alitsü (Hand washing)
- Akütdang aser hachidang tebang nembangang.
- Face mask agiba ajanga iba tashidak nungi kümzüka alitsü

~ Chief Medical Officer, Mokokchung, Nagaland

Iba Olemsabang nung Iemsaba ken-o aser shisatsü ya iba ocet züluri  
bilemba ken-o ama tazüngerri angateta agitsü mepishir

# Impur nung Choirmaster angazükshiba sentong agiogo



**Impur, May 24 (TYO):** ajungmesor. Yamaji tekülem nung kenten tongtipang shilem shitak agitetsü asoshi choirmaster ya kanga tongtipang lir. Iba tongtipang shilem angateta, iba sentong nung tim ken aniyim, rehearsal techniques aser warm-up skilsil sayua tangazükba tulu ngua temoatsü nung agiogo, ta kasa sangdong ajanga metedaktsü.

Arogo nung tekülem mapang ken atenba ajanga nütsüng nürurtem tanelia nung telungjem tajung agia

Ms. Amongbi Jamir, Asso. Pastor, Music Ministry, KABA Shisalen Sayur liasü.

Ajak agi Arogo 54 nungi choirmaster tem aser choir member ajak agi 105 arua iba sentong nung shilem agia denogo.

Maneni ABAM Music Ministry ajanga tekülem nung kentenba nung tongtipang agüja inyaka aodang Tsüngremi Arogotem nung choirmaster tem sempet tajungtiba nung amshia amangbapur ajak temoatsü angutsü amanger.

## Mission wadang nung tasen apiteta inyaktsünündaker: Geoff Peters



Geoff Peters

**May 24, 2024:** Khristai tenyaba wadang tulutiba ajanga Kibuba yimli nung tamangertem ajungmesor; alima tesem ajakleni oa Yisu Khrista osangtajung lemsatepba ajanga nisung jenti taküm melenshidaktsütsü atema asenok jateta lir, ta JESUS film Global Marketing Director, Geoff Peters-i ojet ka ajanga metedaktsü.

"Yisu Khristai Pa nütsüngtem dang, alima kintem ajak dangi oa nütsüng kümdakjang, ta tenya (Mathi 28:16-20). Yisui tenyaba wadangji inyak nungang alima nung tesem tasen balalai oa nütsüngüba mapa inyaktetsü. Tang digital putu ka nung alima nung nütsüng ajak ayimjemtetsüsa asenok nem maongka balala agütsür. Akhidang nungibo tang kanga tekeraba iba wadang inyaktetsü," ta Peters-i ashi.

"Taoba ita The Lausanne Movement-i 'The State of the Great Commission' 2024 report sayaa liasü. Iba report nung

Ajisüaka ano tsüngdong oa Yisu Christia mangashidangertem den Paotsü lemsateptsü nüngdaker, kechiyong tesem aika nung internet mamshirtema lir," ta Peters-i metedaktsü.

Asenoki social media nung taküm kulitem lemsateptsüla, online ajanga o lemteptsüla aser Yisu atema tsüngdong oa nütsüngüba mapa inyaktsüla, ta pai ashi.

Asenoki video, podcasts aser infographics ajanga Yisu temeim lemsateptetsü; noksa/video ajanga nisung aikati Laishiba nung tesayuba balala jungjunga angatdktsütsü akok, ta pai ashi.

"Online ajanga Khristantem den sendakteptsüla aser telok balala den tamang dak sendakba onüktem nung o lemtepba ajanga tangar den sendakteptsü atema maongka angutsü," ta pai ashi.

"Digital putu ka nung tiala osangtüsang aika lir, anungji digital amshia osangtajung prokba maparen nung ajakji ochi dang asütsüla. Taküm kuli balala mesüra chichiba otsü balala ajanga nisung aika Khrista dangi anir arutetsü aser Khrista tali metettsü atema parnok jangradaktsütsü," ta paisa lemsatep.

Iba dak alia Bible study guides aser anogo-apen sarasadem ama digital resources agütsüba ajanga nisung aika Tsüngrem den tesendaktep kadaktsütsü, ta paisa metedaktsü.

"Digital putu ka nung Yisu Khrista taküm otsü aser Yisu temeim lemsateptsü atema tasen apiteta inyaktsü kanga nüngdaka kümogo. Asenoki yamaji inyaktetra asenoki longjemer Yisu temeim indang alima den lemsateptetsü," ta paisa metedaktsü.

## ANOGO ABEN TSÜNGREM DEN

### Taremzük ajanga tesünep

"Tang tesüneptsüba Kibubai peisasa mapa ajak nung ajaklen nem tesünep agüjjang"

(2 Tesa 3: 16).

Shimok temulung Kibuba nung sendaka lir, pamok nem tesünep teperi agütsütsü tenangzükba Laishiba nung angur (Isa. 26:3). Iba ama tesünep angutsüba jenjangji Kibuba nung aremzüka ataba lir, "Shibai amanger, pai meilungtsü" (Isa 28:16).

Asen temulungjang nung tesünep melira, asenok tangar den tesünep nung melitettsü. Loktiliba nung telemsa aliba ajanga nisung mulungjang nung teti rongrong alir. Tsüngrem tesünepi asen tangatetba ajak atendanger (Fil. 4:7). Koba tetezü, tebilemtsü liaka asenoki Tsüngrem tesünep nung pelateptsü akok. Ataba aser aremzükba rniim o lir.

Tsüngremi Khristantem metsü aser tesangwa asütsü asoshi aja, saka metsü tanang aser tesangwa samadok. Arogotem aser Khristantem tesempatep, meputep aser tsükchitep rizükdak kümdaktsü. Yimjung yanglutsüba jinjen nungi tenzüktüba masü. Ibai Kibong aser arogo aser pei alidak lokti nungi tenzüker.

Tsüngchir tejangja temaitsü kaji pa yimjung yanglur asütsüla (Mt. 5:9). Yimjung yanglutsürtem dang nungi yimjung raksar teimba akümer. Adianu rongnung rarabangsen prokba nisung Tsüngremi sempar. Pa chirtem ama yimjung yangluba mapa nung Tsüngrem den külem mapa inyakertem asütsüla. "Yimjung yanglur temi moa".

Kibuba, ni Ne yimjung asoshi nok-o-nü ka kümjang.

## Supreme Court-i Church of South India Synod election nokdanger

**May 24, 2024:** India nung tematiba court, Supreme Court-i mangatettep tulu adoka aliba Church of South India nung synod election agitsü aliba nokdangogo.

May 22, 2024 nü Supreme Court-i tamalen high court kati

Arogo atema shimtsüba administrators dang Synod election ji magii alitsü tuyuogo.

Church of South India ya India nung Protestant denomination tulutibatem rongnung tanabuba jenjang nung lir.

Iba Arogo headquarter ji Tamil Nadu yimbiba, Chennai nung lir aser Arogo kübok India aser Sri Lanka na nung dioceses 24 kübok züngsem million 4 dak tema lir.

April 12 Chennai nung Madras High Court-i retired Justice ana- R Balasubramanian aser V Bharathidasan na Arogo atema administrator shimja liasü.

High court-i Arogo senotsü ketdangsütsü aser Synod election ketdangsüa agitsü atema administrator ana nemji tashi agüja liasü.

1947 küm India nüchiso anguba sülen kasa küm nungisa CSI tenteta liasü.

Supreme Court-i maneni iba ken o ya mei sodi sülen July 8 nungi angadangtsü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**


Tir Yimyim

**Süngya**

- (n) teronem menemtzü mozü yangluba süngdong (agarwood tree)  
 \* Asen lima nunga süngya dong aikati tema lir.

**Süngyak**

- (n) süng nung noksa balala enoka chitetba ( wood carving)  
 \* Ariju tongshi nung süngyak aika keta yanglur.


**OLONG PAITEP # 6797**

1		2		3		4		5	
6				7					
			8		9				
10									11
		12		13		14			
15					16				
17				18					

TIPLEN	LANGTSÜNGLEN
1. Mosai züluba kaket ka - (6)	1. Junger ta ashi - (5)
4. Teku nembangba sobutsü - (4)	2. Kenüa mati - (4)
6. Puteper - (4)	3. Tulu masü - (4)
7. Kidang atem yagi yanglur - (6)	4. Yashi o asüng na yongtsü - (4)
10. Teputep - (9)	5. Ajurutepdak - (6)
15. Aori yangluba aon ka - (6)	8. Amtak - (3)
16. Yirusalem - (4)	9. —— en - (3)
17. Per tulu - (4)	10. Na shiba - (6)
18. Ambangyima agiadok - (6)	11. Amo-amor - (5)
	12. Noklang nung 97 endok - (4)
	13. Kidong ka - (4)
	14. Tekong sobutsü - (4)

**OLONG PAITEP # 6796 TELANGZÜBA**

TIPLEN :	LANGTSÜNGLEN :
2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,	1. Alimang, 2. Pongan, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.

**NAI-A YA METETTER MA**

Mitsubishi Electric Corporation nung Component Production Engineering Center ajanga World Record tasen ka yanglutetogo aser ibaji rotating puzzle cube tekaratiba yanglutetba lir.

Mitsubishi Electric Corporation indang robot ajanga second ka majungdang rotating puzzle cube yangluteta liasü. May 21 nü Tokyo nung 0.305 seconds nung standard 3x3x3 puzzle cube ka yanglutet aser iba ajanga Guinness World Records angu.

**Kaziranga National Park nung shikarir 3 apu**

Guwahati, May 24, 2024

(Agencies): Assam forest department aser police-i May 23, 2024 nü Kaziranga National Park nung güntok shikarir asem apu.

Osang tejangja ka angazükba sülen ketedangsürtemi Golaghat aser Jorhat district tem nung mita ao. May 21 nungi parnoki nisungtem bushiteptsü tenzük.

May 21 nü Amar Choudhury (Harilal Choudhury) apu. Pa ya Bokakhat jilai aodang Jugal Ati yimtsüng nung apu.

Iba sülen May 22 nü yimtsüng nung joint operation ka tenzükdang Gunakanta Doley apu. Pa ya güntok tezü shibelenba nung shilem agia aru.

K e t d a n g s ü r t e m i

May 21 nü Idangji Choudhury-i Achinta Morang dak tai tongloksü,

Achinta dang Empe Morang ta ajar aser güntok tezü shibelenba maparenji pa tongti ser inyaker.

Morang ya Jorhat district kubok Kareng Chapor nung alir aser May 23 nü pa apu. Pa ket nung .303 rifle ka aser injang aliba nangzük aser ibaji Majuli nung güntok shikaridang amshir ta ashi.

Iba dak sendakba nung Wildlife (Protection) Act, 1972, and the Wildlife (Protection) (Assam Amendment) Act, 2009 kubok ken o ka benokogo.

**CoTU-i Kangpokpi mokdangba ajanga NH-102 nung timtem ajuru**

Imphal, May 24, 2024

(Agencies): Hokolbarnü Kuki-Zo nungeri Manipur kubok Kangpokpi district mokdangba ajanga timtem aika ajuruogo.

Parnoki National Highway 102 (Imphal to Dimapur via Kohima) ghonda 9 atema mokdanga liasü.

April 13, 2024 nü Kangpokpi district kubok Phailengmol nung Kuki-Zo volunteer ana tepsetba

mang state sorkari mengutetba atema tejashi sayua Committee on Tribal Unity (CoTU)-i mokdang ayongzük.

Iba mapang Phaijang yimtsüng nung aliba Martyrs' Cemetery nung Kuki-Zo volunteer den asüpila sentong ka ayonga agi. Tanep 9:00 ako nungi taonung 6:00 ako tashi CoTU-i National Highway 102 mokdanga liasü.

Iba mapang district nung sorkar aser nije reju ajak shibang aser Kangpokpi adena Imphal nungi Senapati district inter-state bus services ajaken.

NH 102 nung Dimapur aser Kohima adena Imphal nungi Guwahati tashi senzüba gari ajak Manipur-Nagaland arrtsü anasa Senapati aser Mao nung anendaka liasü.

**Counting day nung Section 144 benokba magizüker: VPP**

Shillong, May 24, 2024

(Agencies): June 4 nü Lok Sabha 2024 counting day nung Shillong nung Criminal Procedure Code (CrPC) Section 144 benokba anema Voice of the People Party (VPP)-i ola adoker.

VPP General Secretary Ricky AJ Syngkon-i Deputy Commissioner aser Returning officer dangi shidi ka züluba

nung nisung lokti adenshitsü memelabaji democratic inyakyim anema lir aser sensotemi electoral process nung shilem magidaktsüba lir ta shia lir.

"Iba tetuyuba ajanga District Administration aser sorkar tashimaitba sayuba dang masü saka tashiyim amshia democracy nung nung nübortem shilem magidaktsüba lir" ta metedaktsüogo.

Sorkar ketedangsürtem aser nübortem tsüngda rara madokdang iba tetuyuba agentsüla ta paisa ashi.

Returning Officer aser East Khasi Hills District District Magistrate SC Sadhu-i June 4 nü Section 144 benokba osang metedaktsüba sülen VPP dena political party ajaki magizüka metedaktsüogo.

**RD aser AJP lokteper regional party tasen ka tentettsü**

Guwahati, May 24, 2024

(Agencies): Assam nung regional party tashitait ka nüngdaker. Assam kümzüka ayutsü atema logo tasen aser constitution tasen dena party tasen ka nüngdaker, Raijor Dal President Akhil Gogoi-i ashi.

Iba mangdang ataloktsü mulungogo aser tang Asom Jatiya Parishad (AJP) tsüngda jembitepdar.

Assam nung yimtenren aser rongsenketzung kümzüka

ayutsü atema regional party tashitait ka nüngdaker. Assam kümzüka ayutsü atema logo tasen aser constitution tasen dena party tasen ka nüngdaker, Raijor Dal President Akhil Gogoi-i ashi.

Raijor Dal-i lokteptsü mulungogo aser tang Asom Jatiya Parishad-i dang lemet agitsü amünga lir. AJP-i technical onüktem ajanga lokteptsü memulungra Regional Coordination Committee ka

ajanga iba atema inyaktsü ta pai metedaktsü.

Assam nung regional party temi shilem tuluba agitsü aser tashi tuluba angutsü atema jembia arur. Iba atema local party temi parnok tashitaitba akümtsü meranger aser Assam dak sendakba onüktem atema inyaker.

RD aser AJP lokteper ajanga Assam yimtenren nung temelensi ka bener arutsü akok.

Papua New Guinea nung anentsüh sashaia alu, nisung jenti sur alitsü



Enga Province, Papua New Guinea nung anentsüh aluba sülen May 24, 2024 nü nüburtem osettsüset bener aodang tangokba noksa ka yangi angur.

**Port Moresby, Monupii/May 24 (Agencies):** Papua New Guinea nung aliba tenemlen anentsüh tulu alu aser yangji nisung aika sur alitsü ta yangji aliba kettangsür aser teyari agütsüba telok temin ashir.

Iba lendong ya Papua New Guinea yimtiba Port Moresby nungi northwest tsütsü mile 370 shi pilar Enga province kubok Kaokalam yimtsüng nung Hokulbarnep 3:00 ako meta ataloka liasü.

Iba lendong nung nisung 100 shi sur alitsü ta osang balala ajanga ashir, saka kettangsür nungi osang tejangja agüja mali.

Iba anentsüh yagi aluyimer aliba tesem nung kongshi, shirnok tenemlen ang alir aser iba amala tesem nung anentsüh kanga bolua lir.

Enga province governor Peter Ipatas-ia osangbener dang, anentsüh tulu alua nisung takum aser ki o jen

Anentsüh tulu tsünglangen

Nükjidong atongtsü atema Russia jembishinütsü renema lir aser tatem maka rara maginer ta Putin-i jangja-jangja shia arur, ta Russia tir indang odongtar Dmitry Peskov-i ashi.

Ukraine indang foreign aser defence ministries nungi telangzüba kecha agüja mali.

"Putin-i raranera mapang talangka raratetsü, ajisüaka Putin ya ceasefire atema renema lir," ta osang ka ajanga ashi.

Taoba hopta Russia indang defence minister inyaktsü economist Andrei Belousov shima yagi aikati Russia indang rongsenketzung ya 'war footing'

nung inyaker amai ajiteter.

Iba sülen tesem kar nung Russian sepaitemi takok ngua arur. Ajisüaka March ita küm trok kümsük tasen atema maneni tir shimsang Putin-i tang tashinung takok ngua aliba nung tenük sünger liner, ta osang ajanga ashir.

World War II sülen Europe nung iba rara ya tesashitiba alitsü, kong anatsülen nisung meyirijang aika takum samaogo aser iba yong antüolen linük temi Russia indang rongsenketzung nung tenokdangba agütsü.

Ano Ukraine litsü jangja-jangja aginera linük tesem ajungalen sepai shimshitsüsa akumtsü ta Putin-i angateta lir aser yamaji pai meinyakner, kechiaser 2022 küm September ita mezüngbuba mobilisation sülen nüburtem rongnung pa sabur ajema akum.

Russia nunger tongpang nung nokdaktsü atema nübu

## Pelaba Lemsateper



Mrs. Lolendanglia (Changdang)

13.09.1941 - 15.05.2024

Onoki teti meima aliba ojala aser kinungtsü Mrs. Lolendanglia temang manemi aliba mapang aser la May 15, 2024 anogo nung iba lima nungi pilar onok mangiyim jashi tia nung alidang kijakibong, lokti tentet aser arogo nungi shirnokisa onok dang meima nebo, rongsen aser sarasadem agi yaritepogo, nenok ajak dang onoki kanga pelaba metedaktsür.

Onokibo nenok nem meyipa agütsütsü kecha maka, saka asen Tayanglur Tsungremi nenok maneni moajangma.

- Temeim Kinungbo, Chirnur, Semchirtem aser Kinungertem.

## March ita tepsetba China nunger nem Pakistan-i sen \$2.58m agütsütsü

Islamabad, Monupii/May 24 agiogo, ta ashi.

**(Agencies):** Pakistan northwest tsütsü Khyber-Pakhtunkhwa province nung March ita China nunger nisung pongu mena aliba gari ka nung takum bendanga agütsür bomb pokloktsüba nung par ponguprong asü aser Pakistan-i parnok kinungertem den sen \$2.58 million agütsütsü telemtetba agiogo, ta Hokulbarnep osang kar ajanga ashi.

China nunger pongu aser Pakistan nunger driver ka mena aliba gari ya March 26 nü Khyber-Pakhtunkhwa kubok Kohistan district nung aliba Dasu Hydroelectric power station construction site bushia aodang Bisham tesem nung tapoktsü oset sera aliba gari ka arua parnok mena aliba gari nung atsük aser par trok prong asü.

Iba lendong nung asüba China nunger kinungertem nem sen \$2.58 million agütsütsü Pakistan indang Economic Coordination Committee (ECC) ajanga Bisham tesem nung tapoktsü oset sera aliba gari ka arua parnok mena aliba gari nung atsük aser par trok prong asü.

China-Pakistan Economic Corridor (CPEC) indang 13th Joint Cooperation Committee senden amentsü anogo k alia aser iba project phase tanabuba atema Ato Kilonser Shehbaz Sharif-i taruba ita Beijing semdangtsü lia iba compensation ya sangdonger.

Sen \$60 billion jenjang CPEC kubok Pakistan nung project balala inyakba nung China nunger meyirijang aika arua inyaker. Saka parnok jenjang talang yong ali rongsen agitsü meranger ta tai tonglokja telungpur temi parnok dak tenük yoker azüdokshir.

Washington den jembi tajungba asütsü ta ashir.

Ajisüaka taoba hopta Kyiv nungi osangbener den jembidang, Putin-i temulung agüja iba ken o jembitsü tejangraba mali amai ajiteter, ta US Secretary State Antony Blinken-i shia liasü.


Iba rara tembangtsü asoshi linük balala lungjemtsü nükjidong jembitsü atema Switzerland-i ayongba sentong ka nung Ukraine adentsü renemtar.

Iba jembishinü ya Zelenskyy-i ajungmesoba lir aser yangji Putin madentsüla ta shia lir. Switzerland-i iba senden nung Russia mejaok.

Moscow-i parnok medeni jembishinübaji tim masü ta ashir. Ukraine aser Switzerland-i iba senden nung China densema Russia tembar linüktem dendaktsüner.

(Maneni tapak 8 nung...)

## Russia Tir Putin-i Ukraine den ceasefire aginer



**Moscow, Monupii/May 24 (Agencies):** Russia Tir

Vladimir Putin-i Ukraine nung rara anena tang raradak tesemtem agizüka ceasefire ka jembintür, aser Kyiv o West nati telangzüba magütsüra raratsü renema lir ta osang balala ajanga ashir.

"Putin-i raranera mapang talangka raratetsü, ajisüaka Putin ya ceasefire atema renema lir," ta osang ka ajanga ashi.

Russia jembishinütsü renema lir aser tatem maka rara maginer ta Putin-i jangja-jangja shia arur, ta Russia tir indang odongtar Dmitry Peskov-i ashi.

Ukraine indang foreign aser defence ministries nungi telangzüba kecha agüja mali.

Taoba hopta Russia indang defence minister inyaktsü economist Andrei Belousov shima yagi aikati Russia indang rongsenketzung ya 'war footing'

Iba sülen tesem kar nung Russian sepaitemi takok ngua arur. Ajisüaka March ita küm trok kümsük tasen atema maneni tir shimsang Putin-i tang tashinung takok ngua aliba nung tenük sünger liner, ta osang ajanga ashir.

Peskov-ibo Russia nung mobilisation menüngdaker aser iba melena armed forces nung volunteer contractors tem Shimoker ta ashi.

Ajisüaka tang asoshiba ceasefire mesüra yimjung ken o jembitsü ya meta nungi inyaktsüba lir.

Ukraine Tir Zelenskyy-i Crimea densema Russia-i rakzüka aliba litsü tem meyipa agitsü nangzüka lir. Crimea ya Russia-i 2014 küm rakzük. Pai 2022 küm ozüng ka sangdongba nung Putin den jembishinütsü ya khenyongi tamakotsü kumdaaktsü.

Zelenskyy ya tir inyaka ali tashi tezungzüktep magitetsü ta osang ka ajanga ashir aser kari Russia ya pa den masü

## Kuwait den WC qualifier asayatsü Indian squad sangdongogo

New Delhi, Monupii/May 24

(Agencies): Kuwait den June 6 nü World Cup qualifier asayatsü atema India-i asayar 27 tenüng sangdongba nung yirua aliba mech forward Parthib Gogoi aser defender Muhammad Hammad maden, koba mapang talangka nungi Indian captain inyaka arudang Sunil Chhetri asoshi tembangba asaya alitsü.

Kolkata nung asayatsü aliba iba asaya asoshi asayartem tenüng ya head coach Igor Stimac-i sangdong.

Bhubaneswar nung asayar 32 munga lir aser parnok rongnung asayar pongu - Phurba Lachenpa, Parthib, Imran Khan, Hammad and Jithin MS - camp nungi yokogo.

"Parnok ajak kanga meranga inyaker asayar tajung lir. Parnok tsünta kanga sashia tokteper, talisa Jithin aser Prathib indang positions nung tokteper," ta Stimac-i sangdong nung ashi.

"Anogo ishika tejakdang Parthib aser Hammad tera yiru aser anogo 7-14 anisüngzük nündaker," ta pai ashi saka

kechi yiruar mashi.

Tanüngba asayartem ya Bhubaneswar nung May 29 tashi training agir Kolkata-i aotsü.

Blue Tigers ya June 6 nü Vivekananda Yuba Bharati Krirangan nung Kuwait den asayatsü.

Kuwait den asayaba sülen India ya June 11 nü Group A nung tembangba match ana atema aotsü aser Qatar den asayatsü.

India ya tang group nung tanabuba jenjang nung lir, aser parnok match pezü asayaba nungi points pezü bera lir.

Group nungi tematiba team ana FIFA World Cup Qualifiers indang Round 3 atema qualify asütsü aser AFC Asian Cup Saudi Arabia 2027 nung asayatsü jenjanga alangzüksü.

Arishi küm 39 tain Chhetri-i international football nungi anisüngzüksü May 17 nü sangdonga liasü.

India asoshi küm 19 football asaya arusang Chhetri atema Kuwait den asaya ya tem asütsü. Pa ya India nunger rongnung goal timba (94)

agütsüteter lir aser tashinung pai India asoshi matches 150 nung asaya lir.

Alima nung tang football asayar rongnung goal timtiba agütsüteter tem rongnung Cristiano Ronald aser Lionel Messi sülen Chhetri ya lir.

All-time list of international goal-scorers nung pa jenjang pezü bura nung lir.

Kuwait den asayatsü atema Indian squad yamai alitsü:

Goalkeepers: Gurpreet Singh Sandhu, Amrinder Singh, Vishal Kaith.

Defenders: Amey Ranawade, Anwar Ali, Jay Gupta, Lalchungnuna, Mehtab Singh, Narender, Nikhil Poojary, Rahul Bheke, Subhasish Bose.

Midfielders: Anirudh Thapa, Brandon Fernandes, Edmund Lalrindika, Jeakson Singh Thounaojam, Lallianzuala Chhangte, Liston Colaco, Mahesh Singh Naorem, Nandhakumar Sekar, Sahal Abdul Samad, Suresh Singh Wangjam.

Forwards: David Lalhansanga, Manvir Singh, Rahim Ali, Sunil Chhetri, Vikram Partap Singh.

## Djokovic tamakok nung French Open-i aor



Geneva, Monupii/May 24

(Agencies): Novak Djokovic-i French Open asoshi tembang terenemshiba ama Geneva Open nung asaya arur semi-finals nung Czech nunger world number 44 Tomas Machac-i tsükdaktsü.

World number one Djokovic, shiba tan hopta arishi küm 37 ajung, pa 6-4, 0-6, 6-1 agi tsükdaktsü.

Serbia nunger Djokovic ya 2024 küm asayamung kata nunga final metongteti lia French Open title defence tenzüksü.

French Open ya clay-court Grand Slam tournament ya Roland Garros nung Deobarnü tenzüksü.

Major titles 24 tashi nung takok ngua otsü yanglur alisang Djokovic ya 2024 küm tennis asayamung kata nunga junga masayateti Geneva nung asaya liasü.

Australian Open semi-finals nung Italy nunger Jannik Sinner-i tsükdaktsüba sülen Djokovic ya Indian Wells nunga asayatsü.

last-32 stage nung tsüka liasü.

Clay-court asayamung tenzüker Monte Carlo nung pai semi-finals tongaka iba sülen Italian Open nung mezüng asaya takok ngur lia yin agi yangluba tzü bottle ka agi Djokovic tekolak nung tsüka liasü.

Ananü lir pa ya Chile nunger rank 32 nung alisang Alejandro Tabilo-i tsükdaktsü.

Geneva nung mezüng asaya nung Djokovic-i Germany nunger Yannick Hanfmann madak takok angu, shibai Andy Murray tsükdaktsü aser iba sülen Dutch nunger Tallon Griekspoor madak takok ngua liasü.

Ajisüaka Machac den asayadang pa yimya tera balaka akum aser temang nunga timtem kar lir ama asaya liasü.

French Open title pezüben buba asoshi asaya tenzükdang Djokovic-i Hombar mesüra Mongulbarnü France nunger Pierre Hugues-Herbert den asayatsü.

## BENDANGLI OSANG : Tapak 7 nungi...

### Russia Tir Putin-i Ukraine den...

Zelenskyy-i Russia sepai ainshitsü akhangba nung linük timbai bhukumtsü atema Ukraine-i Switzerland senden ya amshiner, aser yangji yimzung ken o jembitsü masü talenba ang kar agütsütsü, ta Putini May 17 nü China nungi shia lir.

Taoba mapang Russia-i iba rara atema jembishinütsü renema lir ta shia liasü saka ibai par dak tenüng asentsü merangba lir ta shia Kyiv-i magizük.

2022 nung Ukraine mamakdang raratsü sentong malai ta aiben jembia aruba Putini telok dak tamang akatsü malai, ta Kyiv-i ashir.

US-i senotsü teyari agütsütsü sentongtem menur agizükba ajanga nok-nü agi anüngba den sepaitem peria manioktet i akum, anungji Ukraine-i taoba ita sebai nung teburtem shimoktsü atema arishi küm 27 aliba nungi 25 kumdaaksü.

## BILEMDANGANG

"Pei mapa dangar nem metedaktsüba tajangzük mali."

## Barcelona-i coach Xavi mapa nungi anentsüogo

Barcelona, Monupii/May 24

(Agencies): Tang season nung trophy kata mongutetba sülen Barcelona-i Hokubarnü coach Xavi Hernandez mapa nungi anentsüogo.

La Liga nung Barcelona asoshi tembangba asaya Deobarnü Sevilla nung asayatsü, aser Xavi asoshi iba asaya tem asütsü.

"Barcelona tir Joan Laporta-i Xavi Hernandez dang 2024-25 season nung pa coach meinyaktsü shiogo," ta Barcelona sangdong ka nung ashi.

Taoba mapang Bayern Munich aser Germany coach inyaka alisang Hansi Flick-i Xavi melentsü ama jembir.

January ita Xavi-i season atemba mapang yutsütsü ta shia liasü, saka par teloki kanga junga asayatetba sülen April ita pa aser tir Leporta tsünta taruba season nunga pa coach inyaktsü züngzüktep, koba pa indang contract ya June 2025



ajiga liasü.

Ajistüaka tensa kanga kera melensi aser Spanish media ajanga ashia agi, senotsü agi anünga aliba club kati Real Madrid aser danga European club tulu den tokteptsü tasak ta Xavi-i jembiba nung Laporta jashi.

"Xavi-i coach ka ama inyakba atema Barcelona-i pelar, kong pai asayar ka ama aser captain ka ama asaya aru, aser tarutsü nung pa asoshi tajungtiba moatsür," ta Barcelona sangdong ajanga ashi.

"Anogo ishika tsünta Barcelona-i coaching structure tasenba sangdongtsü."

Taoba season nung Barcelona-i La Liga akok, saka tang season nung parnoki iba title mokoktet.

Parnok ya Champions League nunga Paris Saint-Germain teloki quarter-finals nung tsükdaktsü, Spanish Super Cup final nung Real Madrid-i akok aser Copa del Rey nunga Athletic Bilbao-i tsükdakja liasü.

Xavi ya asayar ka ama Barcelona nung küm 17 liasü, shiba club indang La Masia academy nungi intet.

Pa Qatar nung aliba Al-Sadd nung küm pezü asayar 2019 küm retire süa kasa club indang manager inyak.

Xavi ya yangji season ana tashi lir 2021 küm November ita nungi Ronald Koeman melen Barcelona coach inyak tenzük.

Pa Barcelona coach ama asaya 141 asayaba nungi 89 ben takok ngua liasü.

## FIH Pro League, European Leg nung India tsür tanaben tamakok ajuru

Brussels, Monupii/May 24

(Agencies): FIH Pro League indang European leg nung India tsür hockey team asoshi anaben buba tamakok ajurua liasü, kong Belgium-i 2-0 agi akok.

Coach tasenba Harendra Singh aser captain tasenba Salima Tete nunger lenisüba kubok India tsür ya Bodhbarnü mezüng asaya nung Argentina-i 5-0 agi koka liasü.

Brehostibar aonung Belgium asoshi goal ana ya minute 34 buba nung Alexia T-Serstevens-i ka aser minute ana lir Dweaet Louise-i ka

agüja liasü.

India tsür ya asaya tenzükdang kanga junga asaya liasü aser penalty corner ka ngutetaka goal magütsütsü.

Ajisüaka India tsür kanga meranga asaya liasü aser mezüng quarter ana nung India defence ajang-ajanga nokdaka Belgium nem goal kata meyokdaktsü.

India tsür temi saksalema ball timba amshi aser anaben Belgium defence tendang saka goal kata magütsütsü half-time atong.

Tesem melentepba sülen

Belgium tsür asendenshir asaya aser third quarter tenzüker minute pezü buba nung Alexia-i mezüng goal agütsü.

Minute ana lir Dweaet-i goal ka agüja Belgium ya goal ana akum.

Asaya tatemlen India-i penalty corner ka ngutet saka yangja parnoki goal agütsütsü maongka ngutetaka liasü.

Possession nung India tajungba süaka parnoki goal magütsütsü asaya tembang. India ya ano Belgium den sa Deobarnü asayatsü lir.